



## ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/02/2025

### Ո Ր Ո Շ ՈՒ Մ

### ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

22 հունվարի 2025թ.

Կոռուպցիայի կանխարգելման հանձնաժողովը, մասնակցությամբ Հանձնաժողովի անդամներ Մարիամ Գալստյանի (նիստը նախագահող), Արամայիս Փաշինյանի, Արմեն Մարուխյանի և Լիլիթ Ալեքսանյանի (այսուհետ՝ Հանձնաժողով), 2025 թվականի հունվարի 22-ին քննելով ՀՀ Լոռու մարզի Ստեփանավան համայնքի ղեկավար Արմեն Գառնիկի Գրիգորյանի նկատմամբ Վարչական իրավախախտումների վերաբերյալ օրենսգրքի 169.31-րդ հոդվածի 1-ին մասով նախատեսված զանցանքի հատկանիշներով առերևույթ խախտման կապակցությամբ 2025 թվականի հունվարի 13-ի թիվ ՎԻՎ/02/2025 որոշմամբ հարուցված վարչական իրավախախտման վերաբերյալ գործը՝

### ՊԱՐԶԵՑ

#### **I. Վարչական իրավախախտման վերաբերյալ գործի վարույթի նախապատմությունը.**

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1.1-ին կետով սահմանված գործառույթների իրականացման շրջանակներում հիմք ընդունելով «Infocom» լրատվական կայքի՝ «50 մլն դրամի շինաշխատանքը՝ պաշտոնյայի եղբոր, վերահսկողությունը՝ որդու ընկերությանը.

Ստեփանավան համայնքի գնումները» վերտառությամբ հրապարակումը<sup>1</sup> և ղեկավարվելով Վարչական իրավախախտումների վերաբերյալ օրենսգրքի 244.17-րդ հոդվածի 1-ին մասերով, իրականացրել է հրապարակմամբ ներկայացված տեղեկատվության հիման վրա վեր հանված Վարչական իրավախախտումների վերաբերյալ օրենսգրքի 169.31-րդ հոդվածի 1-ին մասով նախատեսված զանցանքի հատկանիշներով ՀՀ Լոռու մարզի Ստեփանավան համայնքի ղեկավար Արմեն Գրիգորյանի կողմից դրսևորված առերևույթ խախտմանն առնչվող նյութերի ուսումնասիրություն, որի արդյունքում պարզել է.

1.2 2024 թվականի հունվարի 23-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է գնման թիվ N ՀՀ-ԼՄՍՀ-ՄԱԾՁԲ-24/09 պայմանագիրը Ա/Ձ Կարինե Բախշինյանի հետ, որը հանդիսանում է Ստեփանավան համայնքի ավագանու անդամ Արթուր Պապյանի կինը: Թիվ N ՀՀ-ԼՄՍՀ-ՄԱԾՁԲ-24/09 պայմանագրի համաձայն կատարող՝ Ա/Ձ Կարինե Բախշինյանը ստանձնել է մատուցել պատճենահանող և տպող սարքերի քարտրիջների լիցքավորման ծառայություն:

1.3 2024 թվականի հունվարի 29-ին և փետրվարի 27-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է, համապատասխանաբար, գնման թիվ N ՀՀ-ԼՄՍՀ-ՄԱԱՊՁԲ-24/03 և թիվ N ՀՀ-ԼՄՍՀ-ՄԱԱՊՁԲ-24/05 պայմանագրերը Ա/Ձ Աննա Բունիայանի հետ, որը հանդիսանում է նույն համայնքի ղեկավարի տեղակալի՝ Արսեն Հարությունյանի կինը:

1.4 2024 թվականի հուլիսի 12-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է գնման թիվ ՀՀ-ԼՄՍՀ-ՄԱԾՁԲ-24/25 պայմանագիրը «ՍՏԵՓ ՊԼԱՍՏ» ՍՊԸ-ի՝ ի դեմս Ա. Քալանթարյանի հետ, որը հանդիսանում է նույն համայնքապետարանի քաղաքաշինության, հողաշինության, գյուղատնտեսության և բնապահպանության բաժնի պետ Լևոն Քալանթարյանի որդին:

---

<sup>1</sup> <http://surl.li/otqcfm>

1.5 Ուսումնասիրության արդյունքում պարզ է դարձել նաև, որ վերոնշյալ պայմանագրերը կնքելուց առաջ Արմեն Գրիգորյանի կողմից «Հանրային ծառայության մասին» օրենքով սահմանված կարգով Հանձնաժողով չի ներկայացվել դրանց կնքման փաստի վերաբերյալ հայտարարություններ, այդ կերպ թույլ տալով «Հանրային ծառայության մասին» օրենքի 33-րդ հոդվածի 7-րդ մասի պահանջի առերևույթ խախտում:

1.6 Հանձնաժողովի 2025 թվականի հունվարի 13-ի թիվ ՎԻՎ/02/2025 որոշմամբ վերոնշյալ առերևույթ խախտման հիմքով հարուցվել է վարչական իրավախախտման վերաբերյալ վարույթ:

1.7 Հանձնաժողովը 2025 թվականի հունվարի 13-ին Արմեն Գրիգորյանին հասցեագրել է թիվ 01/176-2025 գրությունը, կից ներկայացնելով թիվ ՎԻՎ/02/2025 Վարչական իրավախախտումների վերաբերյալ վարույթ հարուցելու մասին որոշումը, միաժամանակ հրավիրելով անձամբ կամ ներկայացուցչի միջոցով 2025 թվականի հունվարի 20-ին ժամը՝ 16:00-ին մասնակցելու Օրենսգրքի 169.31-ին հոդվածի 1-ին մասով նախատեսված առերևույթ վարչական իրավախախտման հիմքով արձանագրության կազմմանը, ինչպես նաև 2025 թվականի հունվարի 22-ին ժամը՝ 15:30-ին վերաբերելի նյութերի հիման վրա իրականացվող գործի քննությանը:

1.8 2025 թվականի հունվարի 20-ին պատշաճ ծանուցված Արմեն Գրիգորյանի մասնակցությամբ կազմվել է վարչական իրավախախտման վերաբերյալ թիվ ՎԻՎ 04/2025 արձանագրությունը՝ Վարչական իրավախախտումների վերաբերյալ օրենսգրքի 169.31-րդ հոդվածի 1-ին մասով նախատեսված առերևույթ իրավախախտման հատկանիշով:

1.9 Վարչական իրավախախտման վերաբերյալ թիվ ՎԻՎ/02/2025 գործի քննությունը նշանակվել է 2025 թվականի հունվարի 22-ին, ժամը՝ 15:30-ին, ինչի կապակցությամբ վարույթի մասնակիցը պատշաճ ծանուցվել է (հիմք՝ ALO126139135AM ծանուցագիր):

1.10 2025 թվականի հունվարի 22-ին գործը քննվել է պատշաճ ծանուցված վարույթի մասնակցի բացակայությամբ, գործի քննությունը հետաձգելու միջնորդություն չի ներկայացվել:

## **II. Վարույթի մասնակցի ներկայացրած դիրքորոշում ու պարզաբանումներ**

Արձանագրված առերևույթ իրավախախտման առնչությամբ 2025 թվականի հունվարի 20-ին վարչական իրավախախտման վերաբերյալ արձանագրության կազմման ժամանակ Արմեն Գրիգորյանի կողմից ներկայացվել են հետևյալ բանավոր պարզաբանումները, որոնք վերջինիս համաձայնությամբ նաև ձայնագրվել են.

2.1 2024 թվականի հունվարի 23-ին Ա/Ձ Կարինե Բախշինյանի հետ կնքված թիվ N ՀՀ-ԼՄՍՀ-ՄԱԾՁԲ-24/09 ծառայության մատուցման /գնման/ պայմանագրի վերաբերյալ հայտնել է, որ թեև Արթուր Պապյանը հանդիսանում է իր ընկերը, դասընկերը և թիմակիցը, սակայն չի իմացել, որ Կարինե Բախշինյանը հանդիսանում է վերջինիս կինը: Միաժամանակ, Ա.Գրիգորյանը նշել է, որ Արթուր Պապյանը զբաղվում է պատճենահանող սարքերի քարտրիջների լիցքավորումով, ինչպես նաև քարտրիջների լիցքավորմամբ Ստեփանավան և Տաշիր քաղաքներում զբաղվում է միայն Արթուր Պապյանը:

2.2 2024 թվականի հունվարի 29-ին Ա/Ձ Աննա Բունիաթյանի հետ կնքված թիվ N ՀՀ-ԼՄՍՀ-ՄԱԱՊՁԲ-24/03 և թիվ N ՀՀ-ԼՄՍՀ-ՄԱԱՊՁԲ-24/05 գնման պայմանագրերի վերաբերյալ հայտնել է, որ Արսեն Հարությունյանի հետ ունի սերտ անձնական ամենօրյա շփում: Միաժամանակ նշված գնման պայմանագրերի վերաբերյալ Արմեն Գրիգորյանը հայտնել է, որ Ա/Ձ Աննա Բունիաթյանին պատկանող տնտեսական նշանակության ապրանքների խանութը գտնվում է համայնքապետարանի հարևանությամբ և համայնքապետարանը տարիներ շարունակ իր կարիքների համար անհրաժեշտ տնտեսական ապրանքները գնել է այդ խանութից: Նման ապրանքների լայն տեսականի ունեցող այլ ընկերություն չկա, ինչով պայմանավորված Ա/Ձ Աննա Բունիաթյանի վերոնշյալ գնման պայմանագրերի կնքման վերաբերյալ խնդիր չի տեսել:

2.3 2024 թվականի հուլիսի 12-ին թիվ ՀՀ-ԼՄՍՀ-ՄԱԾՁԲ-24/25 գնման պայմանագիրը «ՍՏԵՓ ՊԼԱՍՏ» ՍՊԸ-ի ի դեմս Աշոտ Քալանթարյանի՝ Լևոն Քալանթարյանի որդու հետ կնքելու վերաբերյալ հայտնել է, որ Լևոն Քալանթարյանը երկար տարիներ աշխատել է համայնքապետարանի քաղաքաշինության, հողաշինության, գյուղատնտեսության և բնապահպանության բաժնի պետ և տարիքային սահմանափակումով պայմանավորված վերոնշյալ պաշտոնում դադարեցրել է իր աշխատանքը, բայց որպես փորձառու աշխատակից շարունակել է աշխատանքը համայնքապետարանում որպես համայնքի ղեկավարի օգնական: Արմեն Գրիգորյանն իմացել է, որ Աշոտ Քալանթարյանը Լևոն Քալանթարյանի

որդին է, սակայն որևէ խնդիր «ՍՏԵՓ ՊԼԱՍ» ՍՊԸ-ի հետ գնման պայմանագիր կնքելու փաստի վերաբերյալ չի տեսել:

2.4 Պայմանագրերը կնքելու ժամանակ չի տիրապետել «Հանրային ծառայության մասին» օրենքի 33-րդ հոդվածի պահանջներին, մասնավորապես՝ հոդվածի 7-րդ մասի կարգավորումներին՝ վերադաս կամ անմիջական ղեկավար չունեցող կամ քաղաքական պաշտոն զբաղեցնող անձը սույն հոդվածի 5-րդ մասով նախատեսված դեպքերում 10-օրյա ժամկետում պարտավոր է այդ մասին գրավոր հայտարարություն ներկայացնել Կոռուպցիայի կանխարգելման հանձնաժողով, որն առաջարկում է ձեռնարկել իրավիճակի լուծմանն ուղղված քայլեր, այդ թվում՝ հանդես գալ կոնկրետ իրավիճակում շահերի առկայության մասին հայտարարությամբ: Նշված պարտավորության մասին իմացել է Հանձնաժողովի կողմից վարույթ հարուցելու մասին որոշումը ստանալուց հետո միայն: Ընդունում է, որ փաստացի չի կատարել «Հանրային ծառայության մասին» օրենքի 33-րդ հոդվածի պահանջները:

### **III. Վարույթի համար էական նշանակություն ունեցող փաստեր**

Հանձնաժողովը, ուսումնասիրելով թիվ ՎԻՎ/02/2025 գործում առկա նյութերը, կատարել է հանգամանքների քննություն և հաստատված է համարում, որ՝

3.1 Ստեփանավանի համայնքապետարանի պաշտոնական կայքէջում (<https://stepanavan.am/Pages/DocFlow/Default.aspx?dt=mer>) հրապարակված տվյալների համաձայն՝ Արմեն Գառնիկի Գրիգորյանը 2021 թվականի նոյեմբերի 25-ից մինչ օրս զբաղեցնում է Ստեփանավանի համայնքի ղեկավարի պաշտոնը:

3.2 Ստեփանավանի համայնքապետարանի պաշտոնական կայքէջում (<https://stepanavan.am/Pages/DocFlow/Default.aspx?dt=mer>) հրապարակված տվյալների համաձայն՝ Արթուր Պապյանը 2021 թվականի նոյեմբերի 25-ից մինչ օրս հանդիսանում է Ստեփանավանի համայնքի ավագանու անդամ:

3.3 Կենտրոնական ընտրական հանձնաժողովի պաշտոնական կայքէջում (<https://www.elections.am/Elections/LocalProportional/27733>) հրապարակված տեղեկատվության համաձայն՝ 2021 թվականի նոյեմբերի 14-ին կայացած Ստեփանավան

համայնքի ավագանու ընտրություններում Արմեն Գրիգորյանը և Արթուր Պապյանը ընդգրկված են եղել «Քաղաքացիական պայմանագիր» կուսակցության ընտրական ցուցակում:

3.4 Արթուր Պապյանի պաշտոնեական պարտականությունների ստանձնման հայտարարագրի համաձայն՝ Կարինե Բախշինյանը հանդիսանում է վերջինիս կինը:

3.5 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Կարինե Բախշինյանը 2010 թվականի նոյեմբերի 3-ից հաշվառված է որպես ԱԶ՝ ՀՎՀՀ 69510523:

3.6 Armeps գնումների համակարգի տվյալների համաձայն՝ 2024 թվականի հունվարի 23-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է գնման թիվ N ՀՀ-ԼՄՍՀ-ՄԱԾՁԲ-24/09 պայմանագիրը Ա/Ձ Կարինե Բախշինյանի հետ:

3.7 Հանձնաժողովին հասանելի Պետական եկամուտների կոմիտեի տեղեկատվական շտեմարանի տվյալների համաձայն՝ Արսեն Հարությունյանը 01.04.2022-11.01.2024 թթ. զբաղեցրել է Ստեփանավան համայնքի ղեկավարի օգնականի պաշտոնը, իսկ 2024 թվականի հունվարի 24-ից մինչ օրս զբաղեցնում է Ստեփանավան համայնքի ղեկավարի տեղակալի պաշտոնը:

3.8 Արսեն Հարությունյանի պաշտոնեական պարտականությունների ստանձնման հայտարարագրի համաձայն՝ Աննա Բունիայանը հանդիսանում է վերջինիս կինը:

3.9 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Աննա Բունիայանը 2017 թվականի նոյեմբերի 8-ից հաշվառված է որպես ԱԶ՝ ՀՎՀՀ 83759535:

3.10 Armeps գնումների համակարգի տվյալների համաձայն՝ 2024 թվականի հունվարի 29-ին և փետրվարի 27-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է, համապատասխանաբար, գնման թիվ N

ՀՀ-ԼՄՍԿ-ՄԱԱՊՁԲ-24/03 և թիվ N ՀՀ-ԼՄՍԿ-ՄԱԱՊՁԲ-24/05 պայմանագրերը Ա/Ձ Աննա Բունիայանի հետ:

3.11 Հանձնաժողովին հասանելի Պետական եկամուտների կոմիտեի տեղեկատվական շտեմարանի տվյալների համաձայն՝ Լևոն Քալանթարյանը 07.02.2022 թթ. զբաղեցրել է Ստեփանավանի համայնքապետարանի քաղաքաշինության, հողաշինության, գյուղատնտեսության և բնապահպանության բաժնի պետի, իսկ 01.01.2023-15.07.2024 թթ. նույն համայնքապետարանի քաղաքաշինության և շրջական միջավայրի պահպանության բաժնի պետի պաշտոնը, իսկ 2024 թվականի հուլիսի 15-ից մինչ օրս զբաղեցնում է համայնքի ղեկավարի օգնականի պաշտոնը:

3.12 Արդարադատության նախարարության ՔԿԱԳ ծառայության տվյալների համաձայն՝ Աշոտ Քալանթարյանը հանդիսանում է Լևոն Քալանթարյանի որդին:

3.13 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Աշոտ Քալանթարյանը հանդիսանում է «Ստեփ պլաստ» ՍՊ ընկերության 100% բաժնետերը և գործադիր մարմնի ղեկավարը:

3.14 Armeps գնումների համակարգի տվյալների համաձայն՝ 2024 թվականի հուլիսի 12-ին «Հայաստանի Հանրապետության Լոռու մարզի Ստեփանավանի համայնքապետարանի աշխատակազմ» համայնքային կառավարչական հիմնարկը՝ ի դեմս համայնքի ղեկավար Արմեն Գրիգորյանի, կնքել է գնման թիվ ՀՀ-ԼՄՍԿ-ՄԱԾՁԲ-24/25 պայմանագիրը «ՍՏԵՓ ՊԼԱՍՏ» ՍՊԸ-ի՝ ի դեմս Ա. Քալանթարյանի հետ:

#### **IV. Որոշումն ընդունելու իրավական հիմքերը և հիմնավորումները.**

4.1 «Հանրային ծառայության մասին» օրենքի (այսուհետ՝ Օրենք) 2-րդ հոդվածի 1-ին մասի համաձայն՝ օրենքի գործողությունը տարածվում է հանրային իշխանության մարմինների վրա, ինչպես նաև հանրային պաշտոններ և հանրային ծառայության պաշտոններ զբաղեցնող անձանց վրա: Օրենքի 4-րդ հոդվածի 2-րդ մասի համաձայն՝ հանրային պաշտոնը դասակարգվում է խմբերի՝ պետական և համայնքային: Օրենքի 5-րդ

հողվածի 3-րդ մասով սահմանված կարգավորման համաձայն՝ համայնքի ղեկավարի պաշտոնը հանդիսանում է **համայնքային քաղաքական պաշտոն**:

4.2 Օրենքի 33-րդ հոդվածի 1-ին մասով սահմանված իրավակարգավորման համաձայն՝ շահերի բախումն իրավիճակ է, երբ պաշտոն զբաղեցնող անձի մասնավոր շահերն ազդում են կամ կարող են ազդել վերջինիս պաշտոնական պարտականությունների անաչառ և օբյեկտիվ կատարման վրա:

4.3 Նույն հոդվածի 2-րդ մասով սահմանված իրավակարգավորման համաձայն՝ պաշտոն զբաղեցնող անձի մասնավոր շահը ներառում է որևէ արտոնություն իրեն կամ իր հետ փոխկապակցված անձանց, ինչպես նաև այն անձանց կամ կազմակերպություններին, որոնց հետ ինքը կամ իր հետ փոխկապակցված անձն ունի գործարար, քաղաքական կամ այլ գործնական կամ անձնական հարաբերություններ:

4.4 Նույն հոդվածի 11-րդ մասը կարգավորում է փոխկապակցված անձանց շրջանակը, որի 2-րդ կետի համաձայն՝ սույն հոդվածի իմաստով՝ փոխկապակցված անձինք են պաշտոն զբաղեցնող անձի հետ ազգակցական և **ոչ ազգակցական սերտ անձնական հարաբերություններ ունեցող անձինք**, այդ թվում՝ համատեղ բնակվող անձինք, փաստացի խնամքի տակ գտնվող անձինք, ընդհանուր տնտեսական շահ ունեցող անձինք:

4.5 Նույն հոդվածի 4-րդ մասի համաձայն՝ **պաշտոն զբաղեցնող անձը պետք է խուսափի շահերի բախման իրավիճակի առաջացումից, ձեռնպահ մնա շահերի բախման իրավիճակում գործողություն (անգործություն) կատարելուց** կամ որոշում ընդունելուց, այդ թվում՝ որոշման կայացմանն ուղղված նախապատրաստական աշխատանքներին (փաստաթղթերի նախագծերի կազմում, քննարկումների կազմակերպում, որոշման վրա ազդեցություն ունեցող հանձնախմբերի ձևավորում և այլն) մասնակցելուց կամ այլ կերպ որոշման կայացման գործընթացին մասնակցելուց:

4.6 Նույն հոդվածի 5-րդ մասով սահմանված իրավակարգավորման համաձայն՝ եթե վերադաս կամ անմիջական ղեկավար ունեցող պաշտոն զբաղեցնող անձի կողմից կամ նրա մասնակցությամբ իր լիազորությունների շրջանակում գործողության կատարումը (անգործությունը) կամ որոշման ընդունումը կարող է հանգեցնել շահերի բախման իրավիճակի առաջացման, **ապա պաշտոն զբաղեցնող անձը պարտավոր է 10-օրյա ժամկետում** իր վերադաս անձին կամ անմիջական ղեկավարին ներկայացնել գրավոր



հայտարարություն **շահերի բախմանը վերաբերող հանգամանքների մասին**, որը ենթակա է քննարկման անհապաղ:

4.7 Նույն հոդվածի 7-րդ մասով սահմանված իրավակարգավորման համաձայն՝ վերադաս կամ անմիջական ղեկավար չունեցող կամ **քաղաքական պաշտոն զբաղեցնող անձը սույն հոդվածի 5-րդ մասով նախատեսված դեպքերում պարտավոր է այդ մասին գրավոր հայտարարություն ներկայացնել Կոռուպցիայի կանխարգելման հանձնաժողով**, որն առաջարկում է ձեռնարկել իրավիճակի լուծմանն ուղղված քայլեր, այդ թվում՝ հանդես գալ կոնկրետ իրավիճակում շահերի առկայության մասին հայտարարությամբ:

4.8 Նույն հոդվածի 8-րդ մասով սահմանված իրավակարգավորման համաձայն՝ նախքան վերադասի կամ անմիջական ղեկավարի գրավոր համաձայնությունը կամ **Կոռուպցիայի կանխարգելման հանձնաժողովի առաջարկությունը ստանալն անձը պետք է ձեռնպահ մնա հարցի վերաբերյալ գործողություն կատարելուց** կամ որոշում կայացնելուց, բացառությամբ այն դեպքերի, երբ անհապաղ գործողություն կատարելը կամ որոշում կայացնելը պայմանավորված է անձանց կյանքի, առողջության, իրավունքների, ազատությունների կամ օրինական շահերի, պետական անվտանգության, հասարակական կարգի, առողջության և բարոյականության պաշտպանության անհրաժեշտությամբ՝ այդ մասին տեղեկացնելով վարույթի մասնակիցներին, իր վերադասին կամ անմիջական ղեկավարին, իսկ վերադաս կամ անմիջական ղեկավար չունենալու դեպքում՝ Կոռուպցիայի կանխարգելման հանձնաժողովին:

4.9 ՀՀ կառավարության 2017 թվականի մայիսի 4-ի N 526-Ն որոշման հավելված 1-ով հաստատված է գնումների գործընթացի կազմակերպման կարգը (**այսուհետ՝ Կարգ**), որի 4-րդ կետով սահմանված իրավակարգավորման համաձայն՝ գնման գործընթացը հետևյալ գործընթացների (գործառույթների) ամբողջությունն է՝ 1) գնումների պլանավորում, 2) գնման գործընթացի կազմակերպում (ներառյալ գնման առարկայի բնութագրերի հաստատումը), 3) **պայմանագրի կնքում**, 4) պայմանագրի կատարում և կառավարում, Կարգի 6-րդ կետի 1-ին ենթակետի «գ» պարբերության համաձայն՝ պատվիրատուի ղեկավարը՝ **տեղական ինքնակառավարման մարմիններում՝ համայնքի ղեկավարն է կամ վերջինիս կողմից լիազորված պաշտոնատար անձն է**, Կարգի 7-րդ կետի 2-րդ ենթակետի «ա»

պարբերության համաձայն՝ **պատվիրատուի ղեկավարը**, ի թիվս այլ գործառույթների, **կնքում է պայմանագիրը:**

4.10 «Գնումների մասին» օրենքի 36-րդ հոդվածի համաձայն՝ պայմանագիր կնքվում է գնահատող հանձնաժողովի որոշման հիման վրա՝ պատվիրատուի կողմից:

4.11 «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1.1-ին կետի համաձայն՝ Հանձնաժողովի գործառույթներից է՝ պետական պաշտոն զբաղեցնող անձանց (բացառությամբ պատգամավորի, դատավորի, Բարձրագույն դատական խորհրդի անդամի, դատախազի, քննիչի), համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց վարքագծի կանոնների, բացառությամբ նվերներ ընդունելու սահմանափակումների, և **շահերի բախման կարգավորումների պահպանմանը հետևելը:**

4.12 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.13 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.14 Վարչական իրավախախտումների վերաբերյալ օրենսգրքի (այսուհետ՝ նաև Օրենսգիրք) 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.15 Օրենսգրքի 244.17-րդ հոդվածի համաձայն՝ Օրենսգրքի 169.31-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.16 Օրենսգրքի 169.31-րդ հոդվածի 1-ին մասի համաձայն՝ վերադաս կամ անմիջական ղեկավար չունեցող կամ **քաղաքական պաշտոն զբաղեցնող անձի կողմից շահերի բախման իրավիճակի վերաբերյալ Կոռուպցիայի կանխարգելման հանձնաժողովին շահերի բախմանը վերաբերող հանգամանքների մասին գրավոր հայտարարություն չներկայացնելը՝** առաջացնում է տուգանքի նշանակում՝ սահմանված նվազագույն աշխատավարձի երեքհարյուրապատիկի չափով:

4.17 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին:

**Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.**

«Հանրային ծառայության մասին» օրենքով կարգավորվում են հանրային պաշտոն զբաղեցնող անձի կողմից նույն օրենքով սահմանված դեպքերում շահերի բախման իրավիճակի վերաբերյալ Կոռուպցիայի կանխարգելման հանձնաժողովին շահերի բախմանը վերաբերող հանգամանքների մասին գրավոր հայտարարություն ներկայացնելուն առնչվող իրավահարաբերությունները:

Օրենքի 33-րդ հոդվածի 1-ին մասով սահմանվում է «շահերի բախման իրավիճակի» հասկացությունը, որի համաձայն՝ սույն օրենքի իմաստով՝ շահերի բախումն իրավիճակ է, երբ պաշտոն զբաղեցնող անձի մասնավոր շահերն ազդում են կամ կարող են ազդել վերջինիս պաշտոնեական պարտականությունների անաչառ և օբյեկտիվ կատարման վրա: Միաժամանակ, նույն հոդվածի 2-րդ մասով սահմանված դրույթով բացահայտված է «Պաշտոն զբաղեցնող անձի մասնավոր շահը» բովանդակային սահմանները:

Վերոնշյալ իրավակարգավորումների համակարգային վերլուծությունից հետևում է, որ Օրենքով սահմանված իմպերատիվ պահանջներն ապահովում են պաշտոնատար անձի մասնավոր շահի ինչպես հնարավոր, այնպես էլ փաստացի ազդեցության չեզոքացումը

վերջինիս պաշտոնեական պարտականությունների անաչառ և օբյեկտիվ կատարման վրա, որը կարող է դրսևորվել ինչպես որոշում կայացնելու, այնպես էլ գործողություն կատարելու արարքներում:

Սույն գործով ՀՀ Լոռու մարզի Ստեփանավան համայնքի ղեկավար Արմեն Գրիգորյանը Օրենքի 5-րդ հոդվածի 3-րդ մասով սահմանված կարգավորումների համաձայն՝ հանդիսանում է համայնքային քաղաքական պաշտոն զբաղեցնող անձ, ուստի, վերջինիս նկատմամբ տարածվում են Օրենքի 33-րդ հոդվածի 7-րդ մասով սահմանված շահերի բխմանը վերաբերող իրավակարգավորումները:

Սույն գործում առկա փաստական տվյալների համաձայն՝ Արմեն Գրիգորյանը, որպես պատվիրատուի ղեկավար (ՀՀ Լոռու մարզի Ստեփանավան համայնքի ղեկավար) իր լիազորությունների շրջանակում համայնքի կարիքների համար գնման պայմանագրեր է կնքել Օրենքի իմաստով իր հետ փոխկապակցված (սերտ անձնական հարաբերություններ ունեցող) անձանց հետ անձնական հարաբերություններ ունեցող անձանց՝ Ստեփանավան համայնքի ավագանու անդամ Արթուր Պապյանի կնոջ՝ Ա/Ձ Կարինե Բախշինյանի հետ, նույն համայնքի ղեկավարի տեղակալի՝ Արսեն Հարությունյանի կնոջ՝ Ա/Ձ Աննա Բունիաթյանի հետ և նույն համայնքապետարանի քաղաքաշինության, հողաշինության, գյուղատնտեսության և բնապահպանության բաժնի պետ Լևոն Քալանթարյանի որդի՝ Աշոտ Քալանթարյանին պատկանող «Ստեփ պլաստ» ՍՊԸ-ի հետ:

Հանձնաժողովը, անդրադառնալով վարույթի մասնակցի կողմից ներկայացված բանավոր պարզաբանմանը առ այն, որ պայմանագրերը կնքելիս չի տիրապետել օրենսդրական կարգավորումներին արձանագրում է հետևյալը.

Հանձնաժողովն արձանագրում է, որ Արմեն Գրիգորյանի կողմից նշված հանգամանքը, պաշտոնատար անձին չի ազատում պայմանագրի կնքման գործընթացում շահերի բխմանը վերաբերող հանգամանքները պարզելու և դրանց վերաբերյալ Հանձնաժողովին գրավոր հայտարարություն ներկայացնելու պարտավորությունից, որով ապահովվում է պաշտոնատար անձի՝ շահերի բխման իրավիճակից զերծ մնալու օրենսդրի կողմից կանխորոշված նպատակը: Տվյալ դեպքում պաշտոնատար անձը, որը պարտավոր էր գործել իրավաչափ, չի դրսևորել անհրաժեշտ և բավարար միջոցներ՝ կանխելու հնարավոր իրավախախտումը: Արմեն Գրիգորյանը, որպես համայնքային քաղաքական

պաշտոն զբաղեցնող անձ, պարտավոր էր գործել «Հանրային ծառայության մասին» օրենքով սահմանված պահանջների պահպանմամբ, տվյալ իրավիճակում, մասնավորապես, պարտավոր էր ղեկավարվել Օրենքի 33-րդ հոդվածի 1-ին և 2-րդ մասերի կարգավորումներով:

Ինչ վերաբերում է Արմեն Գրիգորյանի կողմից վկայակոչված այն փաստին, որ ինքը չի ճանաչել Ա/Ձ Կարինե Բախշինյանին, ապա Հանձնաժողովը արձանագրում է, որ որպես համայնքային քաղաքական պաշտոն զբաղեցնող անձ «Հանրային ծառայության մասին» օրենքով սահմանված պահանջների պահպանման նպատակով, այն է՝ շահերի բախման հնարավոր իրավիճակը կանխելը, պարտավոր էր պարզել կնքվող պայմանագրի կողմ հանդիսացող անձի ինքնությունը: Բացի այդ, Հանձնաժողովն արձանագրում է, որ Արմեն Գրիգորյանի բանավոր բացատրությունից հետևում է, որ ԱՁ Կարինե Բախշինյանի կողմից պատճենահանող սարքերի քարտիջների լիցքավորման գործունեությունը Ստեփանավան և Տաշիր քաղաքներում փաստացի իրականացվում է Արթուր Պապյանի միջոցով:

Այսպես, Օրենքի 33-րդ հոդվածի 8-րդ մասով սահմանված իրավակարգավորումների վերլուծությունից բխում է, որ Կոռուպցիայի կանխարգելման հանձնաժողովը շահերի բախմանը վերաբերող հանգամանքների մասին հայտարարություն ներկայացնելու պարագայում անձը պետք է ձեռնպահ մնա հարցի վերաբերյալ գործողություն կատարելուց՝ բացառություն սահմանելով միայն այն դեպքերի համար, երբ անհապաղ գործողություն կատարելը կամ որոշում կայացնելը պայմանավորված է անձանց կյանքի, առողջության, իրավունքների, ազատությունների կամ օրինական շահերի, պետական անվտանգության, հասարակական կարգի, առողջության և բարոյականության պաշտպանության անհրաժեշտությամբ:

Վերլուծելով Օրենքի 33-րդ հոդվածի 7-րդ մասի իրավակարգավորումները՝ պարզ է դառնում, որ նշված իրավակարգավորմամբ նախատեսվում է շահերի բախմանը վերաբերող հանգամանքների մասին Հանձնաժողով հայտարարություն ներկայացնելու պարտականություն, որը չկատարելու համար վարչական պատասխանատվություն է նախատեսված Օրենսգրքի 169.31-րդ հոդվածի 1-ին մասով: Նշված դրույթով սահմանված զանցանքի օբյեկտիվ կողմը դրսևորվում է իրավասու մարմին հայտարարություն չներկայացնելու արարքով:

Հանձնաժողովն արձանագրում է, որ որևէ ձևով դրսևորված փոխկապակցվածության հանգամանքի առկայությունն արդեն իսկ այն ազդակն է, որի պարագայում պաշտոնատար անձը, ում վերաբերելի են շահերի բախմանն առնչվող իրավակարգավորումները, մինչև որոշում ընդունելը կամ գործողություն կատարելը պարտավոր է շահերի բախմանը վերաբերող հանգամանքների մասին Հանձնաժողովին գրավոր հայտարարություն ներկայացնել:

Վկայակոչված հանգամանքով պայմանավորված՝ վարույթի մասնակիցը պարտավոր էր, իր պաշտոնեական պարտականությունների անաչառ և օբյեկտիվ կատարման վրա իր մասնավոր շահի հնարավոր ազդեցության չեզոքացումն ապահովելու անհրաժեշտությունից ելնելով, Օրենքով սահմանված ժամկետում հայտարարություն ներկայացնել Հանձնաժողով: Մինչդեռ, վարույթի մասնակիցն օրենքով սահմանված ժամկետում ոչ միայն Հանձնաժողով չի ներկայացրել նշված հայտարարությունը, այլև, որպես պատվիրատուի ղեկավար, իր լիազորությունների շրջանակում, կատարել է գործողություններ՝ իր հետ փոխկապակցված անձանց հետ անձնական հարաբերություններ ունեցող անձանց հետ կնքել է պայմանագրեր՝ այդ կերպ հայտնվելով Օրենքի իմաստով շահերի բախման իրավիճակում, քանի որ նշված պայմանագրերի կնքումը կարող էր ազդել վերջինիս պաշտոնեական պարտականությունների անաչառ և օբյեկտիվ կատարման վրա:

Սույն գործով առկա փաստերի համադրման արդյունքում Հանձնաժողովը եզրահանգում է, որ Ա.Գրիգորյանի կողմից իր պաշտոնեական պարտականությունների անաչառ և օբյեկտիվ կատարումն ապահովելու նպատակով չեն ձեռնարկվել օրենքով սահմանված համապատասխան գործողություններ շահերի բախման իրավիճակում չհայտնվելու կամ նման իրավիճակում հայտնվելու պարագայում օրենքով նախատեսված՝ կանխարգելման ընթացակարգերով առաջնորդվելու ուղղությամբ:

Վերոշարադրյալի արդյունքում, սույն գործով վարույթի մասնակցի կողմից խախտվել է Օրենքի 33-րդ հոդվածի 7-րդ մասի պահանջը՝ շահերի բախմանը վերաբերող հանգամանքների մասին Հանձնաժողով հայտարարություն ներկայացնելու առնչությամբ, որի արդյունքում թույլ է տրվել Օրենսգրքի 169.31-րդ հոդվածի 1-ին մասով սահմանված արարքը:

Հանձնաժողովը, անդրադառնալով վերոնշյալ իրավախախտման հիմքով պատասխանատվություն սահմանելու հարցին, գտնում է, որ անհրաժեշտ է յուրաքանչյուր գործով գնահատել, արդյոք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյոք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս չի պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Վերոշարադրյալից ելնելով՝ Հանձնաժողովն արձանագրում է, որ Արմեն Գրիգորյանի կողմից կատարված արարքը հանգեցնում է օրենքով պահպանվող շահերի՝ սույն դեպքում «Հանրային ծառայության մասին» օրենքով ամրագրված՝ շահերի բախմանը վերաբերելի իրավահարաբերությունների բուն էության խաթարմանը՝ հաշվի առնելով այն, որ գնման պայմանագրերի կնքմամբ, պաշտոնատար անձը մինչև Կոռուպցիայի կանխարգելման հանձնաժողովի առաջարկությունն ստանալը, ըստ էության, ձեռնպահ չի մնացել գործողություն կատարելուց: Միաժամանակ, առկա չեն եղել նաև այն դեպքերը, երբ անհապաղ գործողություն կատարելը պայմանավորված է եղել անձանց կյանքի, առողջության, իրավունքների, ազատությունների կամ օրինական շահերի, պետական անվտանգության, հասարակական կարգի, առողջության և բարոյականության պաշտպանության անհրաժեշտությամբ:

Այսպիսով, ՀՀ Լոռու մարզի Ստեփանավան համայնքի ղեկավար Արմեն Գրիգորյանն իր լիազորությունների շրջանակում վերոնշյալ գնման պայմանագրերի կնքմամբ կատարել է գործողություն, որն առերևույթ հանգեցրել է կամ կարող էր հանգեցնել շահերի բախման իրավիճակի առաջացման, մինչդեռ, որպես քաղաքական պաշտոն զբաղեցնող անձ «Հանրային ծառայության մասին» օրենքով սահմանված կարգով 10-օրյա ժամկետում շահերի առկայության մասին գրավոր հայտարարություն չի ներկայացրել Հանձնաժողով՝ խախտելով օրենքով սահմանված շահերի բախմանը վերաբերելի իրավակարգավորումների պահանջը:

Միաժամանակ, հաշվի առնելով, որ սույն գործով իրավախախտում կատարած անձը ընդունել է, որ թույլ է տվել օրենքով սահմանված պահանջի խախտում՝ պայմանավորված

պայմանագրերի կնքմամբ, ինչպես նաև ելնելով Օրենսգրքի 32-րդ հոդվածով սահմանված վարչական իրավախախտման համար տույժ նշանակելու ընդհանուր կանոններից, Հանձնաժողովը գտնում է, որ պաշտոնատար անձի գործողություններում առկա է Օրենսգրքի 33-րդ հոդվածի 1-ին մասով սահմանված վարչական իրավախախտման համար պատասխանատվությունը մեղմացնող հանգամանքը:

Ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 26-րդ հոդվածով, Վարչական իրավախախտումների վերաբերյալ օրենսգրքի 169.31-րդ հոդվածի 1-ին մասով, 244.17-րդ հոդվածի 1-ին մասով՝ Հանձնաժողովը

### **Ո Ր Ո Շ Ե Ց**

1. ՀՀ Լոռու մարզի Ստեփանավան համայնքի ղեկավար Արմեն Գառնիկի Գրիգորյանի նկատմամբ կիրառել վարչական տույժ սահմանված նվազագույն աշխատավարձի երեքհարյուրապատիկի՝ **300 000** (երեք հարյուր հազար) ՀՀ դրամի չափով:

2. Տուգանքը պետք է վճարվի իրավախախտողի կողմից գանձապետական 900005001335 «Իրավախախտումների համար կիրառվող վարչական տուգանքներ և պատժամիջոցներ» հաշվեհամարին՝ վճարման անդորրագրի «**նպատակ**» դաշտում **պարտադիր նշելով սույն որոշման համարը:**

3. Սույն որոշումն ուժի մեջ է մտնում Արմեն Գրիգորյանին այն սահմանված կարգով հանձնելու (հանձնված համարվելու) հաջորդող օրվանից:

4. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

**ՀԱՆՁՆԱԺՈՂՈՎԻ ՆԱԽԱԳԱՀԻ**

**ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝**

**ՄԱՐԻԱՄ ԳԱԼՍՅԱՆ**